



ERINDISBRÉF

Notendaráð um málefni fatlaðs fólks

Stjórnskipuleg staða

Notendaráð Sveitarfélagsins Hornafjarðar um málefni fatlaðs fólks heyrir undir velferðarnefnd Sveitarfélagsins Hornafjarðar. Stjórnandi stuðnings- og virkniþjónustu er starfsmaður ráðsins og ritar jafnframt fundargerðir þess.

Skipan, seturéttur á fundum og áheyrnaraðild

Sveitarstjórn Sveitarfélagsins Hornafjarðar skipar sex fulltrúa og jafnmarga til vara í notendaráði Sveitarfélagsins Hornafjarðar um málefni fatlaðs fólks samkvæmt þeim tilnefningum sem á eftir greinir:

- Þrír fulltrúar og þrír til vara skulu tilnefndir af sveitarstjórn að loknum sveitarstjórnarkosningum.
- Þrír fulltrúar og þrír til vara skulu tilnefndir af hagsmunasamtökum fatlaðs fólks á þjónustusvæðinu.

Sveitarstjórn Sveitarfélagsins Hornafjarðar velur og skipar formann og varaformann úr hópi ráðsmanna. Fundargerðir skulu lagðar fyrir velferðarnefnd. Skipunartími ráðsins fylgir kjörtímabili bæjarstjórnar. Aðalmenn boða varamenn sína til fundar ef þeir forfallast.

Auk kjörinna fulltrúa eiga bæjarstjóri og sviðsstjóri velferðarsviðs rétt til fundarsetu með málfrelsi og tillögurétti. Þá er heimilt að kalla til á fundi ráðsins sérhvern þann er tengist málum sem fjallað er um hverju sinni. Starfsmönnum stofnana bæjarins er skylt að sitja fundi nefndarinnar sé þess óskað. Að loknum sveitarstjórnarkosningum heldur ráðið þó umboði sínu þar til nýkjörin bæjarstjórn hefur kjörið nýja nefnd í þeirra stað en með sömu takmörkunum valdheimilda og fyrri bæjarstjórn sætti að afloknum kosningum, sbr. 12. gr. og 2. mgr. 37. gr. sveitarstjórnarlaga.

Hlutverk og verksvið

Hlutverk notendaráðs um málefni fatlaðs fólks er að vera formlegur vettvangur samráðs og samstarfs við sveitarstjórn um hagsmuni fatlaðs fólks þar sem fjallað er um þjónustu við fatlað fólk, framkvæmd hennar og þróun. Notendaráðið stuðlar þannig að skoðanaskiptum og miðlun upplýsinga milli fatlaðs fólks og stjórnvalda um stefnu og framkvæmd í málefnum sem varða fatlað fólk og er þeim og fastanefndum þeirra til ráðgjafar í þeim efnum. Markmiðið með starfi notendaráðs um málefni fatlaðs fólks er að gera fötluðu fólki kleift að hafa áhrif á og taka þátt í skipulagi og framkvæmd þjónustu sem það varðar, svo og öðrum hagsmunamálum sínum á þjónustusvæðinu. Meðal verkefna notendaráðs um málefni fatlaðs fólks er einkum:

- Að vera ráðgefandi fyrir stjórnvöld / sveitarstjórn og hlutaðeigandi stofnanir þjónustusvæðisins um hugmyndafræði og stefnumótun í málefnum fatlaðs fólks.
- Að fylgjast með framkvæmd þjónustu við fatlað fólk á þjónustusvæðinu í samráði við notendur hennar og talsmenn þeirra eða aðstandendur. Í því felst meðal annars að fjalla um ábendingar og tillögur þeirra sem í hlut eiga, þó ekki þær sem varða málefni einstaklinga.
- Að koma á framfæri hugmyndum, tillögum og ábendingum um inntak og tilhögun þjónustu við fatlað fólk á þjónustusvæðinu.



- Veita viðeigandi ráðuneytum umsögn um þjónustu sem félagasamtök, sjálfeignarstofnanir og aðrir þjónustu- og rekstraraðilar hyggjast veita samkvæmt ákvæðum lagna nr. 38/2018 um þjónustu við fatlað fólk með langvarandi stuðningsþarfir.

Ráðið er ekki framkvæmdaaðili.

Starfshættir

Um starfshætti undirnefnda og ráða bæjarstjórnar Sveitarfélagsins Hornafjarðar er fjallað í VI. kafla í samþykkt um stjórn og fundarsköp Sveitarfélagsins Hornafjarðar. Notendaráð um málefni fatlaðs fólks kemur saman minnst fjórum sinnum á ári, formaður stýrir fundi. Boðað skal til aukafunda að ákvörðun formanns eða ef a.m.k. tveir ráðsmanna óska þess. Ráðið getur auglýst einstaka fundi sína opna, en verður annars að samþykkja viðveru hvers þess, sem ekki á seturétt á fundinum. Þá getur ráðið staðið fyrir kynningarfundum vegna starfa sinna eða þeirra verkefna sem til umfjöllunar eru, og skulu slíkir fundir öllum opnir.

Starfsmaður ráðsins sér um að taka á móti erindum og málum sem leggja á fyrir ráðið. Hann útbýr í samráði við formann rafrænt fundarboð þar sem tilgreindur er fundarstaður og fundartími og dagskrá í tölusettum liðum. Fundarboð skal sent öllum aðalmönnum, varamönnum og öðrum sem seturétt eiga á fundum ráðsins. Starfsmaður kemur undirritaðri fundargerð til velferðarnefndar og skal hún tekin á dagskrá næsta fundar velferðarnefnd.. Ályktanir til bæjarstjórnar og bæjarráðs skulu ætíð sendar bæjarstjóra í sérstöku erindi sem starfsmaður ráðsins útbýr. Kjörnir fulltrúar sem kosnir eru af bæjarstjórn skulu fá hæfilega þóknun úr bæjarsjóði fyrir störf sín samkvæmt samþykkt um um kjör og starfsaðstæður kjörinna fulltrúa og njóta fræðslu og stuðnings, þ.m.t. tülkaþjónustu eftir því sem þörf er á.

Eftirfylgni

Velferðarnefnd og starfsmaður ráðsins bera ábyrgð á framkvæmd þeirrar stefnu sem mótuð hefur verið á hverjum tíma varðandi málefni fatlaðs fólks. Formaður og aðrir fulltrúar notendaráðs um málefni fatlaðs fólks skulu snúa sér til bæjarstjóra til að fylgja eftir þeim ákvörðunum og samþykktum sem ekki eru alfarið á verksviði ráðsins að framfylgja.

Réttindi og skyldur ráðsmanna

Um réttindi og skyldur nefndarmanna gilda ákvæði sveitarstjórnarlaga og samþykkt um stjórn og fundarsköp Sveitarfélagsins Hornafjarðar. Nefndarmenn eru bundnir þagnarskyldu, þagnarskylda helst þó látið sé af störfum. Um hæfi nefndarmanna í notendaráði um málefni fatlaðs fólks gilda ákvæði 20. gr. sveitarstjórnarlaga nr. 138/2011. Um hæfi starfsmanna gildir II. kafli stjórnsýslulaga nr. 37/1993.

Lög og reglugerðir

Í störfum sínum skal notendaráð um málefni fatlaðs fólks taka mið af þeim lögum og reglugerðum sem snerta starfssvið þess. Þá skal ráðið fylgja samþykkt um stjórn og fundarsköp Sveitarfélagsins Hornafjarðar.

*Samþykkt í bæjarráði Hornafjarðar 30. júní 2026**

*Hjalti Þór Vignisson
Bæjarstjóri*



**Samkvæmt 7. mgr. 32. gr. samþykktar um stjórn og fundarsköp Sveitarfélagsins Hornafjarðar fer bæjarráð með sömu heimildir og bæjarstjórn hefur ella á meðan á sumarleyfi bæjarstjórnar stendur. Samkvæmt 351. fundi bæjarstjórnar Hornafjarðar þann 4. júní 2026 fer bæjarráð með fullt umboð til afgreiðslu mála á meðan á sumarleyfi bæjarstjórnar stendur, frá og með 16. júní 2026 til 20. ágúst 2026*